

中央研究院
近代史研究所專刊
(40)

劉蓉年譜

陸寶千著

中央研究院
近代史研究所專刊
(40)

劉蓉年譜

陸寶千著

中華民國六十八年四月初版

中央研究院 專刊
近代史研究所 (40)

劉 蓉 年 譜

定價：精裝本新臺幣一八〇元(美金五元)
平裝本新臺幣一六〇元(美金四元五角)

(國外定購另收郵費美金六角)

著 者：陸 寶 千

編印者：中央研究院近代史研究所

發行者：中央研究院近代史研究所

地址：臺 北 市 南 港

承印者：中 外 印 刷 廠

地址：臺北市天水路五一巷二二號

電話：五五一七七六二・九八三一〇六二

版 所 翻 必
權 有 印 究

劉蓉年譜

自序

昔和靖祭伊川曰：不背其師有之，有益於世則未。同甫之譏朱子，謂是風痺不知痛癢之人。似乎性理之學無裨世用。遜清道咸時代，湖湘之間，羅羅山、劉霞仙、曾滌生、郭筠仙輩皆從事於程朱之學。此四人者，先之以友朋，繼之以婚姻，儼然成一集團。及夫太平軍踰嶺而北，彼等皆際會風雲，展其驥足，足爲理學吐氣。四人之中，滌生蕩平大難，號稱聖相。羅山以軍事著，筠仙以外交名，亦皆各有表現。顧霞仙之聲光獨黯。蓋其少時闔然自修，聲氣不廣。及其出而應世，活動於岷江、秦嶺之間，其地偏遠，不能爲中原士大夫所知。雖其治戎泄政，皆有所長，而後人知之者甚鮮。茲取其詩文疏奏，旁采他家文集，就其學術思想，事功成就，按年而譜之。亦在明內聖外王之道，本是一貫，非談心論性者，無與

於生民之休戚也。至若發潛德之幽光，則茲編之餘事爾。昔石田之譜朱子，窮其一生精力而爲之，本書成於倉卒，平素見聞不廣，疎漏謬誤，在所不免，尙祈大雅君子，不吝教之。

民國六十八年一月十八日海門陸寶千叙于南港

劉蓉年譜

陸寶千著

家世

劉蓉字孟容，號霞仙。湖南湘鄉人^①。

先生高祖時拔，字其萃，號鶴亭^②。曾祖必闕^③，祖有璋，父振宗，母譚氏^④。

振宗有子三人，先生居長；次葵，字省庵^⑤，又次蕃，字季霞^⑥。按：羅澤南曾予先生書：「少霞暨薌蒲昆仲今年讀書何所」？此少霞或即指劉蕃也^⑦。

附註：

① 養知書屋文集（郭嵩燾），卷十九，頁六，陝西巡撫劉公墓志銘。

② 養晦堂文集（劉蓉），卷九，頁十四（影印本頁六二九）高祖太學鶴亭府君墓表（此後附註中，本書簡稱文集）

③ 同②，又見湘鄉縣志卷十五，選舉，頁十五；又郭嵩燾陝西巡撫劉公墓志銘稱先生曾祖爲恂南，或以字稱也。

- ④ 俱見湘鄉縣志卷十五，選舉，頁十五；郭嵩燾撰陝西巡撫劉公墓志銘。
- ⑤ 文集，卷九，頁四十一（影印本頁六八三）哭仲弟省庵文。
- ⑥ 文集卷九，頁四十（影印本頁六八一）哭季弟季霞文。
- ⑦ 羅山遺集（羅澤南），卷六，頁十三。

清仁宗嘉慶二十一年丙子（西元一八一六年）先生一歲

四月二十三日，先生生。按：先生曾自記：「同治乙丑四月二十三日爲予五十初度之辰，悵觸平生，感而有賦」①云云。同治乙丑爲同治四年（一八六五），上推四十九年，先生應生於本年。又郭嵩燾陝西巡撫劉公墓志銘及湘鄉縣志劉蓉傳②，俱稱先生卒於同治十二年（一八七三），年五十八，依此上溯五十八年，先生亦應生於本年。

附 註：

- ① 養晦堂詩集（劉蓉），卷一，頁十六（影印本頁八四一）。（此後附註中，本書簡稱詩集）
- ② 湘鄉縣志卷末，叢記，頁十八，劉蓉傳。

道光十三年癸巳（一八三三） 十八歲

春，與曾國藩訂交。先生曾有詩寄懷曾氏云：「憶昔識面初，維時歲癸巳」。癸巳爲道光十三年。又云：「明歲鹿鳴秋，捷足先羣輩^①」。國藩鄉試中式在道光十四年^②，其前一年卽十三年矣。曾氏歿，先生輓歌中有句：「識面初從歲屬蛇^③」。則二人之相識在本年無疑也。曾文正公年譜於道光十四年下稱：「是歲始見劉公蓉于朱氏學舍，與語大悅^④」云云。恐誤。寄懷曾詩中又云：「虎觀夜譚經，龍城春校士^⑤」，則二人相識在本年春季也。是年先生在嶽麓書院讀書。按先生曾云：「予昔讀書嶽麓，取友四方，歲晏而返^⑥」。先生何年始在嶽麓，已不可考，然其遇曾國藩或卽在嶽麓也。

附 註：

① 詩集，卷一，頁七（影印本頁八二三）。

② 曾文正公全集（曾國藩），第一冊，年譜，頁三。

③ 詩集，卷二，頁二十五（影印本頁九三三）

④ 同②。

⑤ 同①。

⑥ 文集，卷九，頁二九，秦鶴仙家傳。

道光十四年甲午（一八三四） 十九歲

與曾國藩同肄業嶽麓書院^①。

八月，曾國藩鄉試中式^②，先生與曾氏相醉三日。按：先生寄懷曾氏詩：「明歲鹿鳴秋，捷足先羣輩，歸來訪舊遊，邂逅成嘉會^③」，又曾太傅輓歌：「棘闈戰罷奪標回，傾蓋殷勤及早梅，一話徵宵三日醉，洛陽真見二鴻來^④」。

冬，曾國藩入京會試，先生送行。按：曾文正公年譜稱國藩於本年「十一月入都^⑤」，先生曾太傅輓歌中有句：「鎮湘城畔送行舟，駐馬荒祠話別愁^⑥」。

附 註：

① 曾文正公全集，第一冊，年譜，頁三（道光十四年條）。

② 同①。

③ 詩集，卷一，頁七（影印本頁八二四）。

④ 詩集，卷二，頁二十五（影印本頁九三三）。

⑤
同①
⑥
同③
。

道光十五年乙未（一八三五） 二十歲

是年先生仍在嶽麓書院①。

是年，曾國藩會試不售，留京。歲暮有雜感詩，其一曰：「舊雨曾遺尺鯉魚，經年不報意何如？自從三益睽違久，學得五君世態疏。碧樹那知離別憾，青燈徧照故人書。殷勤護惜金鑪鴨，香火因緣付與渠②」。殆即懷先生也。

附 註：

① 由先生次年在嶽麓得識郭嵩燾而推知之。

② 曾文正公詩集（曾國藩），卷一，頁三。（一二二二四）

道光十六年丙申（一八三六） 二十一歲

春，在嶽麓書院識郭嵩燾。先生曾太傅輓歌云：「林宗襟度故超羣，春雨長沙共五旬，信是壺中好日月，德星聚處是三人^①」。自注曰：「道光丙申春，予與公及今郭筠仙中丞同寓會城近兩月，聚談極歡。後公在京師有詩及之云：『自從有兩儀，無此好日月』。蓋歎盛會之不可常也^②」。是先生以爲與郭氏相識在本年之春。郭嵩燾玉池老人自敘云：「初遊嶽麓，與劉孟容中丞交莫逆^③」。其臨終枕上詩云：「及見曾劉歲丙申，笑談都與聖賢鄰^④」。是二人之相識在本年無疑且其地在嶽麓書院也。

夏，與曾國藩、郭嵩燾共聚於長沙。玉池老人自敘其與先生相識後，即曰：「會曾文正公自京師就試歸，道長沙，與劉孟容舊好，欣然聯此^⑤」。按：曾國藩於本年會試報罷，出都爲江南之遊，泝江而歸。會試榜發，例在四月初，曾氏如於同月出都，以行程計，其過長沙與先生及郭嵩燾相晤，應爲六月中旬之事矣。唯按郭氏自敘中語，此次之會，似係在三人

相識之初，恐係事後追憶之誤也。

秋，嘗拜謁曾國藩父麟書公^⑥。

附 註：

- ① 詩集，卷二，頁二十五（影印本頁九三三）。
- ② 同①。
- ③ 玉池老人自敘，頁三十四。
- ④ 養知書屋詩集（郭嵩燾），卷十五，頁十六。
- ⑤ 同④。
- ⑥ 文集，卷四，頁二十一，（影印本頁二六五）上曾封翁舉節孝書。

道光十七年丁酉（一八三七） 二十二歲

本年先生仍在嶽麓讀書，以先生曾致書友人，有「自酉歲嶽山晤後」之語，可知其本年在嶽麓也。

二—三月 復與曾國藩、郭嵩燾會於長沙。先生寄懷國藩詩云：「酉年會長沙，懽懷及春盛。郭君復鼎來，心期得雙璧。萬古此良時，千金驕一詠，此樂復何年，盛事難爲更^①」。又國藩爲檢討時，在京曾有書與先生；先生答書中有云：「回憶酉年聚首，此境寧可復耶^②」。又曾復郭嵩燾書云：「三十年前，君與滌公（國藩）及吾三人者，雅志相期，孤芳自賞。……滌公督師赴徐，（同治四年，西元一八六五年），數以書來，言精神大減……兩三年間，或者先後聯翩，竟踐酉年之約，談道著書，豈非大快^③」。〔時先生在陝撫任內，郭氏撫粵，曾氏剿捻無功，三人均不甚如意〕，所謂酉年，即道光十七年丁酉。「春盛」應爲二三月間。先生復有詩云：「君返瀏陽棹，我下麓山帷^④」。蓋三人相會後，曾氏由長沙東

去劉陽，而先生則入嶽麓讀書也。

十二月，曾國藩北上會試。曾過訪先生^⑤。

附 註：

- ① 詩集，卷一，頁七（影印本頁八二四）。
- ② 文集，卷四，頁十七（影印本頁二五七）。
- ③ 文集，卷七，頁二十八—三十（影印本頁五〇七至五一二）。
- ④ 同①。
- ⑤ 文集，卷三，頁十七（影印本頁一八五）。